



Inatsisartunut Ilaasortaq
Bentiaraq Ottosen
Atassut

Kujataanut ikiorsiissutissat pillugit § 37 naapertorlugu apeqqummut akissut

04-11-2024
Sags nr.: 2024 - 14633

Asasara Bentiaraq,

Postboks 930
3900 Nuuk
Tlf. (+299) 34 68 00
Fax (+299) 43 02
E-mail: an@nanoq.gl
www.naalakkersuisut.gl

Sikorsuaqarnerata malitsigisaanik Kujataanut ikiorsiissutissat pillugit Naalakkersuisunut apeqquteqarninnut qujanaq. Apeqqutitit tulliuuttumi tulleriiaarlugit akineqarput:

1. Kujataani inuussutissarsiortunut ikiorsiissutitut qinnuteqaatit pillugit Naalakkersuisut sulianik qulaajalluarsimappat?

Kujataani inuussutissarsiutilinnut ikiorsiissutissat Aningaasaqarnermut Akileraartarnermullu Ataatsimiititaliamit akuersissutigineqanngimmata, suliffeqarfiit qinnuteqaatinik nassitsisinnaasimanngillat. Ikiorsiissutitut ikiorserneqarnissamut piumasaqaataasussat, naatsorsutigisamillu ikiorsiissutissat tamakkiisumik aningaasartassai ikiorsiissutissat pillugit isummernissamut tunngavissiami Naalakkersuisut nassuiaatigaat. Ikiorsiissutissanut tunngatillugu allaffissornissaq politikikkut suliassaanngimmat allaffissornissaq, qinnuteqartoqassappallu qinnuteqaatinik misissuinissaq Nalik Venturesimit (Nalik) aamma Innovation South Greenlandimit (ISG) isumagineqartussaagaluarpog. Pisariaqartitsineq qanoq annertutigissanersoq misissorniartullugu Naalakkersuisut aamma Aningaasaqarnermut Akileraartarnermullu ataatsimiititaliap isummernissaannut Naalakkersuisut tunngavissiornerminnut atatillugu Nalik aamma ISG qinnuigaat, ikiorsiissutissanit qassit qinnuteqaratarsinnaassanersut eqqoriaaqqullugit. Tassunga tunngatillugu suliffeqarfiit 10-15-it missaanniittut ikiorserneqarnissaminnik qinnuteqassagaluartut eqqoriarneqarpoq. Ikiorsiissuteqarnissami sinaakkutissat inissitsinnagit, akuerineqartinnagillu qasserpiaassanersut paasineqarsinnaasimanngilaq. Piumasaqaatit tunuliaqutaralugit Nalik, ISG-lu qinnuteqaatinik misissuilluarsimassagaluarnernut Naalakkersuisut tatiginnilluinnarput.

2. Kujataani imaatigut angallannikkut suliffeqarfiutillit namminersortut pillugit inuussutissarsiutitut ikiorsiissutitut suliat suuppat?

a. Taamaangippat, Naalakkersuisut pilersaarutiginerpaat suliat allat?

Ilaasunik angallassinissani, nuannaariartitsinissanillu neqerooruteqartarlutik takornariartitsinermik inuussutissarsiutilinnut ikiorsiissutissanut apeqqutigineqartoq tunngavigineqarpoq. Ikiorsiissutissat akuerineqanngimmata ikiorsiissutissanik qinnuteqartoqarsinnaanngilaq. Sikorsuaqarnerata malitsigisaanik suliffeqarfiit aningaasatigut ajornartorsiuteqartut kaammattorneqarput, taarsigassarsiat allanngortinneqarnissaannut, akiligassat kinguartinneqarnissaannut, assigisaannulluunniit periarfissat misissorumallugit aningaaserivimminnit imaluunniit Nalik Venturesimit ilitersortinniaqqullugit.

3. Suliffeqarfiit namminersortut pillugit akileraarutininik naamassinninnissaq qulakkeerumallugu ikiorsiissutininik qinnuteqarsinnaaneq ammatinneqarpa? Silap pissusaa inuussutissarsiutinut ajornartoortitsippat?

Immikkut ittumik sikorsuaqarneratigut suliffeqarfiit kaaviiartitassaraluaminnik annertuumik, uppersakkamillu annasaqarsimasunut ikiorsiissuteqarnissaq, Kujataanut ikiorsiissutissat pillugit isummernissamut tunngavissiami siunertaasimavoq. Silap pissusaata allanngornera pisumut sunniuteqarneris ilisimaneqanngilaq. Ikiorsiissutissat tapiissutitut aningaasaliinertut nunap karsianit aningaasalersorneqartussaagalarput.

Pissutsit assigiinngitsut patsisigalugit suliffeqarfiit akileraarutinut akiligassaminnik kinguaattooruteqalersimasut akileraarutissap akilernissaa, matumani akilersuinissaq ilanngullugu isumaqatigiissusiornissaq pillugu Akileraartarnermut Aqutsisoqarfimmik oqaloqarsinnaajuaannarput. Paatsuungasoqannginnissaa pillugu oqaatigineqassaaq, tapiissutit isertitatut isigineqartarmata, tamannalu pillugu ukiumut isertitanut akileraarusigassaasunut ilaasarmata, tapiissutit nalinginnaasumik tiguisumut akileraarusigaasarmata.

4. Innovation South Greenland aamma Nalik Ventures qanoq Naalakkersuisut suleqatigilluartigaa?

Nalik Ventures aktianik piginneqatigiiffiuvoq Namminersorlutik Oqartussanit pigineqartoq, Kalaallit Nunaannilu inuussutissarsiorterit siuarsarnissaannut soqutigisat Naalakkersuisut sinnerlugit tapersersussallugit ingerlatseqatigiiffiup siunertaralugu. Ingerlatseqatigiiffik Namminersorlutik Oqartussanit kiffartuussinissamik isumaqatigiissuteqarnermigut aallarnisaanianut inuussutissarsiutitigut siunnersuisarpoq, tapiissuteqartarlunilu. Taamaattumik Naalakkersuisut Nalik Venturesimik suleqateqarluarput. Tassunga tunngatillugu suliffeqarfiit namminersortut nammeneq aningaasaataannut aningaasaliinikkut ingerlatseqatigiiffik aningaasaleeqataasuusinnaasarpoq, taamaalillunilu

inuussutissarsiutinik siuariartortitsinerunissami tunngaviusinnaalluni. Kiisalu suliffeqarfiit assigiinngitsutigut ineriartornerinut ingerlatseqatigiiffik taarsigassarsisitsisarpoq, matumani aamma kinguaariit nikinnerinut. Taamaattumik Kalaallit Nunaanni inuussutissarsiutitigut siuariartorneq pitsaanerulersinneqarnissaa siunertaralugu, inuussutissarsiutitigut aningaasaqarnermik misissueqqissaarnissamik ingerlatseqatigiiffik ukkataqarpoq.

Naalakkersuisut Innovation South Greenlandimik malittarisassanik aallaavilimmik suleqateqanngillat, sammisalli Kujataani inuussutissarsiutilinnut pingaaruteqartut pillugit ataavartumik oqaloqatigalugit. Assersuutigalugu takornarialerinerimik ineriartortitsinissaq pillugu inuussutissarsiutilinnik, innuttaasunillu ataatsimiisitsinerinut atatillugu ISG annertuumik ikiuunnikuuvoq.

Sikorsuaqarneranut atatillugu piffissaq tamakkerlugu Naalakkersuisut Nalimmik, ISG-millu ataavartumik oqaloqateqartarnermikkut, oqalliseqateqartarnermikkullu qanimut suleqateqarput. Pisoq pillugu ilisimasanik katersinerimikkut, takornariartitsinermillu inuussutissarsiorfiup iluani inuussutissarsiutilinnik, takornariartitsinermillu inuussutissarsiummut attuumassuteqarlutik inuussutissarsiutilinnik eqqugaasunik amerlassusiliineq ilanngullugu Nalik aamma ISG annertuumik tapersiipput.

5. Inuussutissarsiutinut ikiorsiissutit qanoq annertutigippat?

Apeqqut immikkoortuni tamani inuussutissarsiutinut ikiorsiissuteqarnissamut tunngassuteqarani, ikiorsiissutissatut siunnersuutigineqartoq kisiat tunngavigineqarpoq. Naalakkersuisut isummernissamut tunngavissiaanni aningaasaliissutit 0 koruuniupput, immikkulli tunngavissaqarnikkut 25 mio. koruunit tikillugit atuisoqarsinnaanissaanut piginnaatitsisoqarluni. Taamaakkaluartoq apeqqut 1-ip akinerani eqqaaneqartut qinnuteqartussatut naatsorsuutigineqartut malillugit aningaasat atorineqartut tamarmiusut ikinnerussasut naatsorsuutigineqarpoq.

Inussiarnersumik inuulluaqqusillunga

Naaja H. Nathanielsen
Naaja H. Nathanielsen